



# COOK ISLANDS CHRISTIAN CHURCH

## Executive Council

Head Office Phone: 26546 Fax: 26540 Email: [adminpub@oyster.net.ck](mailto:adminpub@oyster.net.ck) P.O. Box 93, Rarotonga, Cook Islands

~~~~~

27 Aperira 2006

- ✓ Ki te au tavini rave angaanga katoatoa i roto i te au Ekalesia CICC i te Kuki Airani nei, Nuti Reni e Autireria
- ✓ Ki te au mema CICC katoatoa i roto i te au Ekalesia tatakitai

### KARERE NUMERO 5 MEI ROTO ATU I TE KUMITI AKAARE

Kia orana,

Te rekareka nei au i te tuku atu i te pepa akakitekite i runga nei ma tona vava'anga i raro nei:

#### Vava'anga

1. Akatomoanga
2. Koreromotu i Rotopu i te CICC e te Anau Apiianga
3. Akatakaanga i te Angaanga a te Kopapa Akateretere o Takamoā
4. Te Taoanga Director of Publications kua Tieni
5. Tere o te President ki te Uipaanga a te au Orometua o NZ 2006
6. Nuti mei Mangaia mai
7. Te Peroveta Pikikaa ko Marama (Sun Myung Moon)
8. Tere o te Tekeretere Maata ki Autireria
9. Nga Akakoroanga Mamaata i Autireria
10. Orometua Tiaki no Coburg
11. Uipaanga a te Vainetini
12. Tauiaanga Orometua 2007
13. Uipaanga Maata 2007
14. Au Tere ki Nuti Reni
15. Te au Ekalesia e to Ratou Turanga
16. Akatotoaanga i te Nuti Leta
17. Akairo no te au Tavini o te Atua
18. Popani

**Annexes:** I: Agreement between CICC and Takamoā Students  
II: Terms of Reference, Takamoā Theological College Board  
III: Status of CICC Branches in the Cook Islands, New Zealand and Australia

Otira ua, .....

Nga Mataio  
Tekeretere Maata

## **KARERE NUMERO 5 MEI ROTO ATU I TE KUMITI AKAERE**

*(Akapapaia e Nga Mataio, Tekeretere Maata, CICC)*

### **1. Akatomoanga**

“Kua tu akaou tika’i ra te Mesia mei te mate maira, kua riro ia ei momua no te aronga i topa te moe ra. Mei te mate oki i rauka i te tangata ra, no te tangata katoa i rauka’i te tuakaouanga i te aronga i mate ra. Mei te tangata i ope i te mate ia Adamu, e ope katoa i te akaoraia e te Mesia.” (1 Korinetia 15.20-23).

Kia orana akaou e taku au taeake rave angaanga i roto i te Atua, pera kotou e te au mema i roto i te akarongo. E tau ia tatou kia akameitaki i te mana katoatoa koia tei oronga mai i teia tikaanga manea kia aravei Evangelia akaou tatou na roto i teia pepa akakitekite no te 5 o te taime, e no te rua o te taime i teia mataiti ou 2006 ta te Atua i akatae mai ia tatou.

Me e au nuti ta kotou tei anoano kia tauruia ki roto i teia au tataanga ki mua, tuku mai kiaku me kore ki to tatou opati i Takamoā.

### **2. Koreromotu i Rotopu i te CICC e te Anau Apiianga**

No te maata o te manamanata e kitea mai nei i roto i te au apianga me oti ta ratou apii, e pera tetai au Orometua e rave angaanga nei i roto i te au Ekalesia, kua ariki te kumiti akaere e kia kimi ia te au ravenga kia iti mai teia au tai’i e kitea nei. Teia i raro nei te au tai’i:

#### Apiianga i Takamoā

- Kauraro-kore ki te au akateretereanga a te Puapiii Maata
- Kauraro-kore ki te au akanoonoanga o Takamoā

#### Orometua i roto i te Ekalesia

- Kauraro-kore ki te au akanoonoanga a te Ekalesia
- Marama-kore i te akateretere uipaanga
- Rave ua i to ratou anoano i te tienianga i tetai au akonoanga a te Ekalesia
- Vava’i Ekalesia na roto i te tukeke o te irinakianga
- Akariro e ko ratou te pu o te Ekalesia

No teia au manamanata e kitea mai nei, kua ariki te kumiti akaere kia tataia tetai koreromotu i rotopu i te CICC e te anau apianga. Ko te manako ki konei koia oki kia akamatutua te anau apianga no runga i teia au turanga ia ratou i Takamoā, e ia ratou ka oki atu ki ta ratou au Ekalesia tatakita. Na roto i teia mataara, e tikaanga ireira to te Puapii Maata me kore kumiti akaere kia akaatea ia mai ratou te ka rave maro uatu rai i to ratou anoano ma te kore e kauraro marie ki te au akanoonoanga i Takamoā e pera i roto i te au Ekalesia tatakita.

Ko te koreromotu tei oti i te tataia tena tei topiriria mai ki muri i teia tataanga (**Annex I**). Kua taangaanga iatu teia koreromotu no te taime mua na roto i te au anau apianga tei oti ta ratou apii i roto ia Noema 2005, e pera ratou tei tomo mai ki Takamoā i teia mataiti 2006.

Ka irinaki e ka pure katoatoa tatou no te au tavini o te Atua i Takamoā e pera i roto i te au Ekalesia tatakita, kia riro ratou i te patu i te are o Iehova, auraka te vava i raro. Patianga katoa mei konei atu i te kumiti akaere kia kotou e te au Orometua i roto i te au Ekalesia, kia kauraro marie kotou ki raro ake i te akateretereanga a ta kotou Ekalesia, ei reira e maru ei to kotou nooanga ki rotopu ia ratou. Kare oki e ko kotou te pu o te Ekalesia, ko te Ekalesia ra to kotou pu e, e aronga angaanga kotou na te uipaanga maata, na roto i te kumiti akaere.

### **3. Akatakaanga i te Angaanga a te Kopapa Akateretere o Takamoa**

I roto i te newsletter no.4 kua akamarama iatu e kua akamata akaouia te kumiti akateretere o Takamoa, tena te au ingoa o te kumiti tei akakite iatu. I roto katoa i te reira newsletter, kua taiku au e ka tuku iatu te akatakaanga i te angaanga a teia kopapa. I na te tuku atu nei ireira au i te reira tena kua topiri ia mai ki muri ake i teia tataanga (**Annex II**).

Te kite ra kotou e te au taeake e, e maata te au angaanga tei anoanoia teia kopapa kia rave ei puapinga e ei meitaki no te tupuanga o te apii. Ko te mea maata ki konei koia oki kia meitaki te akateretereanga e pera te turanga apii o Takamoa, kia rauka te turanga teitei i ta tatou au apiianganga e noo nei ki Takamoa, e ratou katoa te ka na muri mai.

### **4. Te Taoanga Director of Publications kua Tieni**

Ka maara ia kotou tei tae ki te uipaanga maata 2005 e ko te tuanga o te Publications ko tetai ngai teia kare e matutu ana e ka inangaroia kia akameitakiia. Kua akairo katoaia oki teia ki roto i te **Resolutions** o te uipaanga maata. Noatu te au tuatua akamaroiroi i te taeake i mou i teia taoanga (Rev. Tutai Nooana), kare rai i kitea atu tetai turanga meitaki. No reira i roto ia Titema 2005 kua ariki te kumiti akaaere e kia tieni iatu te tangata e mou nei i teia taoanga.

I roto ireira ia Tianuare 2006, kua akanoo atu te Tekeretere Maata ia Rev. Tutai Nooana e kua mono atu iaia ko Tangi Kapi no tetai tuatau poto. Te tauturuia nei a Tangi e Jimmy Metuakore, e tamaiti kua oti tana apii Bibilia (Bachelor of Theology) mei te Fiji College of Theology and Evangelism. Te tauturu katoa nei oki a Jimmy i te Puapii Maata o Takamoa i te apii anga i tetai au apii (subjects). I teia au tuatau ki mua e akapapu (confirm) ia'i tetai tangata tinamou ki runga i teia taoanga puapinga o te akonoanga.

Irinaki tatou e ka riro teia tienianga ei meitaki ma te akapuapinga mai i te turanga o teia tuanga maata i roto i to tatou opati i Takamoa.

### **5. Tere o te President ki te Uipaanga a te au Orometua o NZ 2006**

Kua tae atu te President ki te uipaanga mataiti a te au Orometua o Nuti Reni i te nga ra 24-26 o Peperuare tei raveia ki te Ekalesia Christchurch. Kua ripoti mai te President e kua mataora aia i te piri atu anga ki roto i teia uipaanga, i te kite atu anga i te au tumu manako tei uriuria no te tupu meitaki anga o te Evangelia tapu a to tatou Atu i Nuti Reni i raro ake i te tamaruanga a ta tatou nei akonoanga CICC. Noatu kare tetai pae i tae, kua riro ra te maata anga tei tae ki te uipaanga ei akamaruarua i te akakoroanga e ei pumaana ki te Ekalesia Christchurch i te mea oki e no ratou tetai tuatau e te taimi i pou i te akateateamamao anga no teia akakoroanga maata. Ka oki mai teia uipaanga ki Akarana a teia mataiti ki mua 2007.

### **6. Nuti mei Mangaia mai**

Kua akaou iatu te are apii Sabati o Oneroa, Mangaia, i nga epetoma i topa i raro ake i te akatereanga a te kamuta maata Keta Williams e tona aronga angaanga mei Rarotonga mai. Kua utuutu iatu te oraanga o te aronga angaanga e Ekalesia e pera nga Ekalesia keke i roto i te oire. Kua rave katoa ia atu tetai kimikimi anga moni no te oko nooanga e te au kaingakai tei tamanako ia ka pou tere atu i te \$10,500 te oko i teia au apinga nei kua na roto i a te patianganga i te Canada aid e te anoano ia nei e 40% na te Ekalesia e 60% na te Canada.

Kua akamata ia atu te ngai ekeke anga ki raro i te tai i Ivirua tei tauturu ia mai e te European Union na roto ia Vereara Maeva-Taripo tei patiiia atu i te tuatau i aere atu ei a Tungane Williams e te President no te iriiri kapua ki Mangaia i roto ia Mati 2003. Kua riro na te Kamuta o te TTN i rave i te patu anga tei turuturu ia e nga Orometua o Ivirua (Rev. Papa Aratangi) e pera to te Ivirua Christian Centre koia a Pastor Tauturu. Manea te angaanga e kua riro na te Kavana ko Mrs Turi Vaipo e te Konitara ko Tangi Aratangi i akanoonoo i te angaanga tei turuturuia e Papa Taata Tangatakino. *(Kua tukuia mai teia karere e Tungane Williams mei Mangaia mai).*

## 7. Te Peroveta Pikikaa ko Marama (Sun Myung Moon)

Mei te mataiti mai i topa e tae rava mai ki teia mataiti, ko tetai tumu manako teia e riro nei i te akaoriori i te manako o te au keresitiano o nga akonoanga tuketuke i runga i te tu o te enua nei ko Rarotonga. E taeake teia tona ingoa ko Sun Myung Moon (ka kapiki ua tatou iaia e ko Marama) tei akatupu aia i tetai akonoanga akamorianga Atua i Korea ko tei karangaia te ingoa e ko te Unification Church. Ko te Moonies te ingoa o te aronga e aere ana ki teia akonoanga. Teia te mea akaora, te tuatua nei a Marama e koia te Mesia tei oki mai ei akaora i to teiane ai.

I na kua tae atu tetai o to tatou iti tangata ki Korea i te mataiti i topa na roto i te patiang a Marama, no te matakitaki i tetai o te au peu a teia taeake e tana akonoanga. Kua riro oki te au akapouanga katoatoa (costs) e na teia akonoanga a Marama i tutaki. Kua tae mai te akakite e te parani nei teia taeake i te aere mai ki te Kuki Airani nei no te akatupu i tetai manga o tana akonoanga ki konei ia tatou. Kua timata ana rai aia i te rave i teia ki roto i nga basileia i te Pacifica nei, kua patoi ia mai ra aia e te kavamani o te reira au enua.

Kia tae mai teia karere ki Rarotonga nei, kua maroiro to tatou iti tangata e pera te taokotaianga Religious Advisory Council (RAC) i te patoi atu i te reira. Kua raveia tetai au uriurianga manako i runga i te TV e pera te ratio no runga ia Marama e tana au moemoea. Te rekareka nei au i te ripoti atu e i roto i teia atianga, kare e tuatua akaou e teiea a Marama i teiane. I te akaraanga e noatu kua kaka maina te marama ki roto i te poiiri, kare rai a Marama i manako e ko te marama mou teia tei tae mai kia tatou. Kua irinaki rai aia e koia te Mesia, te akaaroa. Maara iaku te imene a te mapu ko tei nako mai e; "Te marama te au etu te iti mai nei, te iti mai nei ki runga iaku e."

## 8. Tere o te Tekeretere Maata ki Autireria

Mei te ra 16 Mati – 3 Aperira 2006, kua rauka te tikaanga manea kia aravei ma te atoro atu au i nga Ekalesia i Autireria. E tere teia noku no taku ngai angaanga i te tua o te makete, e kua rauka i te kapiti mai te akakoroanga o te Evangelia ki roto i teia teretereanga, kore atu ei e akapouanga moni mei te pute maata a te akonoanga. Kua aru katoa mai iaku toku tokorua e te nga tamariki. Kua akamata teia teretereanga ki Cairns (3 ra), e oti Townsville (1 ra), Brisbane (2 ra), Coffs Harbour (1 ra, aravei taeake), Sydney (5 ra), e taopenga ki Melbourne (5 ra). Ireira kua na Akarana mai matou (3 ra), oki mai ei ki Rarotonga.

I roto i teia teretere anga, kua rauka teia au turanga i raro nei:

|                             |   |                                                         |
|-----------------------------|---|---------------------------------------------------------|
| Ekalesia Westcourt, Cairns  | - | uipaanga ki te au mema, rave pure i te Sabati 19 Mati   |
| Ekalesia Whiterock, Cairns  | - | uipaanga ki te au mema, rave pure i te Sabati 19 Mati   |
| Ekalesia Townsville         | - | uipaanga ki te au mema, Ruirua 21 Mati                  |
| Ekalesia Logan              | - | uriuri manako ki te Orometua, Paraparau 23 Mati         |
| Ekalesia Brisbane           | - | uriuri manako ki te Orometua, Paraparau 23 Mati         |
| Ekalesia Berela, Sydney     | - | uipaanga ki te au mema, rave pure i te Sabati 26 Mati   |
| Ekalesia Liverpool, Sydney  | - | aravei i te Orometua e nga mema, Sabati 26 Mati         |
| Ekalesia Dulwich Hill, Syd. | - | uipaanga ki te au mema, Monite 27 Mati                  |
| Ekalesia Reservoir, Melb.   | - | uipaanga ki te au mema, Ruitoru 29 Mati                 |
| Ekalesia Coburg, Melb.      | - | uipaanga ki tetai o te au mema, Paraparau 30 Mati       |
| Ekalesia Clayton, Melb.     | - | uipaanga ki te uipaanga Diakono, Maanakai 1 Aperira     |
| Ekalesia Dandenong          | - | aravei i te Orometua e tetai nga mema, Sabati 2 Aperira |
| Ekalesia Springvale         | - | aravei i te Orometua e tetai nga mema, Sabati 2 Aperira |

I roto i te au uipaanga taku i rave atu, kua uriuri iatu te au manako no runga i te moni akaputu ki te pute maata, uipaanga maata e tu mai nei 2007 ki Nuti Reni, tauiaanga Orometua 2007, akakotingaanga tuatau no te aronga mou taoanga i runga i te kumiti akaaere, akateretereanga (administration) i roto i te au Ekalesia, turanga o te au Orometua ou tei oti i te akatainua i roto ia Noema 2005, akatupu Ekalesia ou, au tuatua akakitekite (newsletters), apii Takamoa, e te vai atura.

I roto i teia teretereanga, kua kite tika'i au i te puapinga maata e kia atoro putuputu atu te kumiti akaaere i te au Ekalesia. Na roto i teia au atoro anga, e kitea atu ei te au manamanata, tai'i, e pera te turanga tika'i o te au Ekalesia tatakaitai. No reira kua riro teia tere noku ei mea puapinga i te aravei atu anga i te au mema i roto i teia au Ekalesia, e te kite mata anga i to ratou turanga tatakaitai.

Kua mataora tika'i au e toku ngutuare i te au utuutu anga a te au Ekalesia ia matou i rotopu ia ratou. I teia atiangā te oronga akaou atu nei au i to matou reo akameitakianga maata rava kia kotou e te au taeake ma te au tuaine no ta kotou i rave no matou i to tatou tuatau i noo poto ei. Ta kotou au arikiriki anga, te au ngutuare i nooia e matou, ta kotou au rima oronga, kare ua e rauka ia matou kia akaoki atu i to kotou meitaki tumatetini. Kia riro te Atua i te akakiki mai i ta kotou au vairanga, e pera nana e akatupu i te au manakonakoanga ta tatou i uriuri no te au tuatau ki mua.

Kia kotou e te au Ekalesia kare i atoro iatu ake i te Kuki Airani nei e Nuti Reni, kare kotou i akangaropoina ia. Te vai nei te tuatau – i mua ake i te uipaanga maata 2007 – e rauka'i kotou kia atoro iatu, me kare e naku na tetai o te au mata i runga i te kumiti akaaere.

## **9. Nga Akakoroanga Mamaata i Autireria**

E toru ia nga akakoroanga (projects) mamaata i Autireria tei waitata te tuatau no te akamata te angaanga ki runga.

### Ekalesia Westcourt – Cairns

Kua kite au i te ngai tei oti i te akanooia no te akatu anga i te Are Pure, Kainga Orometua e te Hall okotai ngai. E ngai manea teia e kua manuia tika'i te Ekalesia no teia ngai tei rauka iaia. Ko te parani a te Ekalesia koia oki kia oti teia akakoroanga maata i te openga o teia mataiti, tomo iatu ei i te tuatau o te uipaanga a te Konitara Ekalesia o Autireria te ka rave akaouia ki Cairns. Waitata ki te \$1m tei tamanakoia e ka pou ki runga i teia akakoroanga. Akamaroiroi e te Ekalesia Westcourt, kare rava oki e mea e kore e tika i te Atua.

### Ekalesia Berela – Sydney

E akakoroanga katoa to teia Ekalesia mei to Westcourt rai, inara ko te ngutuare te ka akatuia ko te Are Pure e pera te Hall. Ko te roa o teia akakoroanga koia oki te ngai vairanga apinga akaoro (parking space). Me atea ua teia ngai tai'i, kua papa teia akakoroanga i te aere ki mua. No reira te oronga katoa atu nei au i te reo akamaroiroi o te kumiti akaaere kia koe e teia Ekalesia, kia manuia e kia tae te akakoroanga ki te openga ma te meitaki e te manea.

### Ekalesia Clayton – Melbourne

Na roto i to teia Ekalesia taokotaianga (partnership) ki te Uniting Church of Australia, kua rauka tetai akanoonooanga e kia riro e na te Uniting Church e akaou ma te akamaata atu i te Are Pure e te Hall o te Ekalesia. No te maata o te au mema e aere nei ki teia Ekalesia, kua meangiti ireira te nga ngutuare kare e rava meitaki ana i te tuatau akamorianga e pera te au angaanga mamaata a te Ekalesia. Noatu oki e, e tuanga rai ta te Ekalesia i roto i teia akaouanga te ka raveia, kua riro ra te maata anga o te akapouanga no teia akakoroanga e tei runga i te upoko o te Uniting Church. No te akonoanga Uniting katoa oki te ngutuare e noo nei te tavini o te Atua ma te tutaki-kore. Ka tapapa atu tatou i te tuatau e oti mai ei teia akaouanga i nga ngutuare.

### Manako topiri

Kia kotou e te au Ekalesia i Nuti Reni e Autireria kare i rauka ake tetai ngai tinamou no kotou, tena te akaraanga a tetai au Ekalesia tei angaanga kapiti ki te au akonoanga papaa, e kua riro to ratou au ngutuare ei ngai akaruru anga no te au akakoroanga o te Ekalesia. Ko tetai nga akaraanga koia oki te Ekalesia Hastings, Ekalesia Reservoir, Ekalesia Coburg, e te vai atura. Na roto i tetai au akanoonooanga (agreements), kua rauka tetai ravenga no teia au Ekalesia kia taangaanga i te

au Are Pure o te papaa ma te kore e apainga maata ki runga ia ratou no te tutaki tarauanga. No reira no te apainga maata me ka akatu kotou i tetai ngutuare no kotou rai, tena te au ngutuare e vai uara penei na roto i tetai au ravenga mei ta tetai au pae Ekalesia i rave, ka rauka ia kotou i te taangaanga atu i te au ngutuare e vai nei o tetai au akonoanga keke, akara atu ei ki te au tuatau ki mua me kua anoano kotou kia akatu i tetai ngutuare no kotou rai. Kare oki teia i te apainga mama.

#### **10. Orometua Tiaki no Coburg**

Ko te Ekalesia Coburg i roto ia Melbourne tetai tei arikiia e te uipaanga maata 2005 ki raro ake i te tamaruanga a te CICC. I te marama Peperuare 2006 kua tae mai te Tekeretere o teia pepe ou (Bobby Dean) ki roto i te uipaanga a te kumiti akaaere no te akamarama mai i to ratou turanga e ma te pati mai i tetai Orometua no ratou. I te mea ra e, te ou nei rai teia pepe kare i rauka ake i te tu ki runga i ona nga vaevae, kare ireira te kumiti akaaere i ariki i te patianga. Kua ariki ra te kumiti e kia riro te Orometua akatainu ou ia i te mataiti i topa, Rev. Tuakeu Daniel (e tamaiti na te Orometua o Oneroa, Rev. Daniel Tuakeu), i te angaanga kapiti ki te pae i te au mema o teia Ekalesia. Ka riro oki teia akanoonoanga i te akamama i te apainga i runga i nga tavini o te Atua i Melbourne e riro nei i te atoro atu i teia Ekalesia i tetai au atianga.

#### **11. Uipaanga a te Vainetini**

Kua raveia te akatuera anga i te uipaanga 2-mataiti a te Vainetini CICC ki Arorangi i te Sabati 16 Aperira e kua topiri iatu ki Arorangi rai i te Sabati 23 Aperira. E 170 au mama i te katoatoa tei tae mai ki te uipaanga: to Rarotonga nei, pa enua tonga, pa enua tokerau, Nuti Reni e Autireria. Noatu e kare tetai nga Ekalesia i mata ia maina no tetai au tumuanga, kua pou mai ra te maata anga e kua meitaki ua te uipaanga i te raveia anga. I teia taime tena ratou kua oki atu no te akatupu i ta ratou i akaoti. Penei ka riro rai e na te au mama tei tae mai e oronga akakite atu i te au nuti e te au mea ta ratou i uriuri i roto i te uipaanga kia kotou e te au Ekalesia tei mata ia mai.

Teia i raro nei te aronga mou taoanga tei ikiia no nga mataiti e rua e tu mai nei:

| <b>Taoanga</b>      | <b>I mua ana</b>         | <b>I teia taime</b>      |
|---------------------|--------------------------|--------------------------|
| President           | Mrs Patiare Tangatututai | Mrs Patiare Tangatututai |
| Vice President      | Mrs Natiti Pereeti       | Mrs Natiti Pereeti       |
| Secretary           | Mrs Ina Tou              | Mrs Rangi Nooana         |
| Assistant Secretary | Mrs Tapita Potoru        | Mrs Tapita Potoru        |
| Treasurer           | Mrs Tuki Wright          | Mrs Tuki Wright          |
| Assistant Treasurer | Mrs Rangi Nooana         | Ms Pani Ben              |

Ka riro e na te Ekalesia Titikaveka e rave (host) i te uipaanga o te mataiti 2008.

#### **12. Tauiaanga Orometua 2007**

E maata te au patianga a te au Orometua tei tae mai no te akakoroanga maata e tu mai nei i teia mataiti ki mua, koia te tauiaanga Orometua. Teia te akanoonoanga no teia akakoroanga:

|                   |                                                                                                                                                   |
|-------------------|---------------------------------------------------------------------------------------------------------------------------------------------------|
| Tiunu/Tiurai 2006 | Kua oti mai te akanoonoanga mua (1 <sup>st</sup> draft) a te kumiti o te au Orometua                                                              |
| Aukute            | Kua akara te kumiti akaaere i te au tamanakoanga a te kumiti o te au Orometua. Me e au tienianga ta te kumiti akaaere, ka tauru iatu teia ki roto |
| Okotopa/Noema     | Ka tuku iatu te tamanakoanga ki te au Ekalesia katoatoa. Me e manako to ratou, ka tuku mai i mua ake ia Mati 2007                                 |
| Peperuare 2007    | Kia pou mai te manako o te au Ekalesia e te au Orometua. Kare e arikiia te au manako te ka tuku mai i muri ake i teia marama                      |
| Mati/Aperira      | Ka akara te kumiti akaaere i te au tamanakoanga no te taime openga, tapapa iatu ei te ripoti ki te uipaanga maata                                 |

Tepetema Ka uri e ka akatinamou te uipaanga maata i te ripoti no te tauanga  
 Orometua  
 31 Titema 2007 Kua pou te au Orometua katoatoa ki roto i ta ratou au Ekalesia ou

### **13. Uipaanga Maata 2007**

Kua akapapu mai te konitara Ekalesia o Akarana i te au ra (dates) e ravei'ai te uipaanga maata 2007 ki Akarana, koia oki **23-30 Tepetema**. E mea puapinga kia akairo kotou e te au Orometua e pera te au mata i teia nga ra, noatu te roa o te tuatau e vai ki mua ia tatou. Ka akakite iatu rai te turanga o tetai au akateateamamao anga ta Akarana e rave nei i teia tuatau, tei anoania te katoatoa kia kite, me papu mai te reira. No reira auraka e noo vare ua, tatou tika'i e te au Ekalesia i te Kuki Airani nei e pera to Autireria. Ko te taime rai teia i te akateateamamao, akaputuia te moni no te tutaki i te pairere i te mea oki e ko te akapouanga maata teia no tatou te ka tere atu ki Nuti Reni.

laku i noo poto ki Nuti Reni i muri ake i te tere ki Autireria, kua rauka tetai tikaanga manea kia aravei ma te uriuri manako atu ki nga taeake e akatere nei i te au akateateamamao anga no te uipaanga maata 2007. Ko teia au taeake koia oki te Orometua Joel Taime (Tekeretere o te Konitara Ekalesia o Nuti Reni), te Orometua David Teaurere (Tiemani o te Konitara Ekalesia o Akarana), e pera te taeake Sadaraka Puroku (Tekeretere o te Uipaanga Diakono, Ekalesia East Tamaki). Kua maru te ngakau i te kite anga atu e kua akamata takere a Nuti Reni i te parani no te uipaanga, noatu e kare i waitata ake ki te reira tuatau. No reira te oronga atu nei au i te reo akameitaki e te akamaroiroi o te kumiti akaaere kia kotou i Akarana e apai nei i teia zuko. Kia riro te mana katoatoa i te akamama i ta kotou apainga.

### **14. Au Tere ki Nuti Reni**

Kia kite mai te au Ekalesia katoatoa i te Kuki Airani nei e pera kotou i Autireria, teia te akanoonooanga i te au tere kimi puapinga ki Nuti Reni i teia tuatau tei tae mai te akakite mei te Tekeretere o te Konitara Ekalesia o Nuti Reni:

#### **2006**

Ekalesia Vaipae - Tepetema  
 Ekalesia Tauhunu - Noema

Ko teia ua te nga tere te ka arikiia no te toenga o teia mataiti

#### **2007**

Kare okotai tere e arikiia, ka akapou a Nuti Reni i tona maroiroi no te utuutuanga i te uipaanga maata

#### **2008**

Ekalesia Arutanga - tamanakoanga no te tere atu i roto ia Okotopa. Tei iakoe e Nuti Reni teia i te akapapu kia Arutanga

### **15. Te au Ekalesia e to Ratou Turanga**

Penei e mea puapinga kia kite te katoatoa i to tatou to te CICC maroiroi i runga i te au enua. Noatu e kua kite takere tetai pae, kua manako au e kia oronga akakite akaou atu i teia akapapaanga ei kiteanga na te katoatoa, na ratou tika'i kare i kite ake, mei te au taeake tomo ou mai ki roto i te akonoanga, ta tatou mapu, e te vai atura.

Te vai nei rai te ekoko i roto i tetai maata anga o te au mema e eia tika'i Ekalesia i raro ake i te tamaruanga a te CICC, teia ua'i ratou, e eaa to ratou turanga. Tena ireira te akapapaanga kua topiri ia mai ki muri i teia tataanga (**Annex III**). Te vai atura te au ngai e kitea atu nei e ka tau kia akatupuia tetai Ekalesia ki roto, i runga tika'i ia Nuti Reni e Autireria. E mea papu rava e ka anau mai tetai au Ekalesia ou i te au ngai tei noo ia e to tatou iti tangata e kare e Ekalesia waitata mai kia ratou. Na te tuatau ra e akatupu i te au manakonakoanga.

## 16. Akatotoaanga i te Nuti Leta

laku i atoro atu ia ratou i Autireria, e pera i nga ra i Nuti Reni, kua taitai'a te ngakau i te kite atu anga e te vai nei rai tetai au mema i roto i te au Ekalesia kare ake rai i kite ake i nga nuti leta e 4 tei tuku takere iatu. Teia oki te au tuatau i raro nei i tuku iatu ei teia au nuti leta:

|                    |                |
|--------------------|----------------|
| Nuti Leta Numero 1 | Tepetema 2005  |
| Nuti Leta Numero 2 | Okotopa 2005   |
| Nuti Leta Numero 3 | Titema 2005    |
| Nuti Leta Numero 4 | Peperuare 2006 |

I roto i tetai au Ekalesia, ko tetai pae ua tei kite, kare tetai pae. **Patianga akaaka kia kotou e te au tavini o te Atua e pera kotou i roto i te au Ekalesia e tuku tika atu nei au i teia au nuti leta na runga i te emere (email), me ka tika kia akatotoa atu kotou i teia au karere puapinga ki to kotou au mema katoatoa.** E maata te au mea puapinga e tuku iatu nei kia kotou na roto i teia au nuti leta tei anoanoia to kotou au mema kia kite. Ko te mea maata ki konei koia oki kia kore rava e akaapa anga e tae mai ki te kumiti akaaere e kare kotou e kite ana eaa te tupu nei i roto i ta tatou akonoanga CICC. No reira akamaroiroi mai kotou, te rave nei matou i ta matou tuanga i Rarotonga nei i te tata ma te tuku atu i te karere, na kotou e akatotoa atu i te reira ki to kotou au mema. Me pera kotou, i toku manako ka maru ua to tatou teretere marie anga i runga i te vaka o te Evangelia tapu a to tatou Atua.

## 17. Akairo no te au Tavini o te Atua

Te kitea mai nei e te vai nei tetai au tavini rave angaanga no te Atua i roto i te au Ekalesia tatakitali e kare o ratou akairo (cerfificates) i oronga ia ana, me kore kua ngaro te akairo tei oronga takereia kia ratou i te tuatau i akatainu ia'i ratou. Ko teia au tavini e tuatuaia nei koia oki, ko te au Orometua, Tauturu Orometua, Elders, Tauturu Orometua kua akangaroi, e te Orometua kua akangaroi. I nga epetoma i topa, kua rauka tetai o teia au akairo i te maani ia e kua tuku iatu kia ratou tei akakite mai e kare o ratou akairo. E tai kua ngaro tona, e kua rauka tetai akaou i te maani.

No reira teia te akamaramaanga ki konei, me ko koe tetai i roto i teia au pupu tangata i runga nei e kua anoano koe i tetai akairo kia maaniia me kore kia maani akaouia noou, akakite mai kiaku me kore ki te tamaine angaanga i roto i to tatou opati i Takamoa. Ko te au tuatua tei anoanoia kia tukuia ki runga i te certificate ta kotou ka tuku mai koia oki; toou ingoa, taau Ekalesia, taoanga, te ra i akatainu ia'i me kore i akangaroi mai ei koe no runga i te taoanga. Akakite mai me kare i rava teia akamaramaanga.

## 18. Popani

Tena ireira e te au taeake ma te au tuaine te au mea tei anoano ta kotou kumiti akaaere kia oronga akakite atu ei kiteanga no kotou i te au mea e tupu nei, e te parani ia nei no teia au tuatau ki mua i roto i ta tatou nei akonoanga. Irinaki matou i runga i te kumiti akaaere e ka riro teia au akakitekiteanga ei pumaana ki roto i to kotou au ngakau tatakitali.

Ei taopenga i teia karere, te na ko nei a Paulo, "E tena na kua akatuia akenei kotou ki runga e te Mesia katoa ra, ka kimi i te au mea ki runga, i te ngai i nooia e te Mesia i te rima katau o te Atua ra." (*Kolosa 3.1*)

Ei konei tatou i te tuatua akakite anga i tona aroa opekore uatu rai, Amene.



**ANNEX I: Agreement Between the Cook Islands Christian Church and the Takamoā Theological College Students**

**A. Cook Islands Christian Church (CICC)**

The CICC agrees to the following on behalf of the Takamoā Theological College students:

- (a) Provide adequate training facilities (lecture rooms, furniture, computing, photocopying and other equipments, library, etc.) for students undertaking short-term and long-term studies at the Takamoā Theological College (TTC);
- (b) Provide adequate accommodation facilities for students living on campus at TTC;
- (c) Ensure that there are sufficient lecturers at TTC at all times to cover the topics stipulated in the TTC syllabus;
- (d) Ensure that the training programme being undertaken by the students are in par with those in similar training institutions overseas;
- (e) Ensure that the parishes being represented by the students are regularly updated, through the TTC Principal, on the academic progress of students;
- (f) Ensure that all students are fully aware of the guiding rules, requirements and conditions (code of conduct) of TTC, including implications of non-compliance;
- (g) Appoint a management board for Takamoā who, together with the Principal who will also be the chairman, will spearhead the above commitments.

**B. Takamoā Theological College Students**

In return, the Takamoā Theological College students agree to the following:

- (a) Fully abide by all of the guiding rules, requirements and conditions (code of conduct) of TTC while undergoing studies at the college, on the understanding that failure to do so may lead to their expulsion from the college;
- (b) Fully abide by all prevailing rules, regulations, policies and management practices of the CICC while serving in a CICC parish, on the understanding that failure to do so may lead to their expulsion from the parish that they are serving;
- (c) In case students do not wish to abide by B(a) and B(b) above, they will automatically be denied entry into TTC in the first instance, and any CICC parish at the end of their studies.

-----  
**DECLARATION**

As a full-time student, I declare that I have (i) read the above conditions and fully understand them, (ii) decided to abide by every clause of the above conditions, and (iii) accept the consequences should I fail to comply with all conditions stipulated.

STUDENT

Signature: .....

Name: .....

Date: \_\_\_\_ / \_\_\_\_ / \_\_\_\_

WITNESS (CICC Representative)

Signature: .....

Name/Position: .....

Date: \_\_\_\_ / \_\_\_\_ / \_\_\_\_

## **ANNEX II: Management Board for the Takamoa Theological College**

### **TERMS OF REFERENCE**

The Board will be chaired by the Principal, Takamoa Theological College, and will undertake the following tasks:

- (a) Devise a code of conduct for students residing and undergoing studies on campus, and ensure that the code is closely adhered to at all times;
- (b) Ensure that the Agreement between the CICC and the students are complied with;
- (c) Regularly review the college syllabus in order that teaching methods and topics covered are in line with those being implemented by similar institutions overseas;
- (d) Seek outside funding for various college projects, such as teaching aids and equipments, infrastructural improvements, etc.
- (e) Through HRD and other avenues, seek funding for both short- and long-term scholarships to enable capable students to further their studies after completing from Takamoa;
- (f) Arrange for visiting lecturers as part of the teaching programme;
- (g) Regular monitoring and evaluation of students' academic progress;
- (h) Identify and report any necessary maintenance requirements of the college;
- (i) Through the Chairman, regularly update the CICC Executive Council on all aspects associated with the college;
- (j) Produce an annual report to the CICC Executive;
- (k) Produce a biennial report to the CICC General Assembly which must be cleared by the CICC Executive prior to presenting to the Assembly;
- (l) Undertake related tasks that may be required by the CICC Executive.

#### **Meetings**

The board shall meet as and when the need arises, but no less than 6 times a year.

#### **Compensation**

Membership on the board is voluntary, i.e. no monetary payment shall be made within the foreseeable future. However, members are free to help themselves to the coffee/tea facilities of the main office.

#### **Secretarial Assistance**

The church will provide the necessary secretarial services associated with the work of the board, such as typing, photocopying, taking the minutes of board meetings, contacting members for board meetings, etc.

**ANNEX III: CICC Branches in the Cook Islands, New Zealand and Australia***(as of April 2006)*

| Location                   | Full/financial member<br>(FM) | Partial/non-financial<br>member (PM) | Total     |
|----------------------------|-------------------------------|--------------------------------------|-----------|
| <b>COOK ISLANDS</b>        |                               |                                      |           |
| RAROTONGA                  |                               |                                      |           |
| Avarua                     | FM                            |                                      |           |
| Matavera                   | FM                            |                                      |           |
| Ngatangia                  | FM                            |                                      |           |
| Titikaveka                 | FM                            |                                      |           |
| Arorangi                   | FM                            |                                      |           |
| Nikao                      | FM                            |                                      |           |
| Sub-total Rarotonga        | 6                             | -                                    | 6         |
| AITUTAKI                   |                               |                                      |           |
| Arutanga                   | FM                            |                                      |           |
| Tautu                      | FM                            |                                      |           |
| Vaipae                     | FM                            |                                      |           |
| MANGAIA                    |                               |                                      |           |
| Oneroa                     | FM                            |                                      |           |
| Ivirua                     | FM                            |                                      |           |
| Tamarua                    | FM                            |                                      |           |
| MAUKE                      |                               |                                      |           |
| Kimiangatau                | FM                            |                                      |           |
| Oiretumu                   | FM                            |                                      |           |
| ATIU                       | FM                            |                                      |           |
| MITIARO                    | FM                            |                                      |           |
| Sub-total Southern Islands | 10                            | -                                    | 10        |
| PEHNRYN                    |                               |                                      |           |
| Omoka                      | FM                            |                                      |           |
| Tetautua                   | FM                            |                                      |           |
| MANIHIKI                   |                               |                                      |           |
| Tukao                      | FM                            |                                      |           |
| Tauhunu                    | FM                            |                                      |           |
| RAKAHANGA                  | FM                            |                                      |           |
| PUKAPUKA/NASSUA            | FM                            |                                      |           |
| PALMERSTON                 |                               | PM                                   |           |
| Sub-total Northern Islands | 6                             | 1                                    | 7         |
| <b>Total Cook Islands</b>  | <b>22</b>                     | <b>1</b>                             | <b>23</b> |
| <b>NEW ZEALAND</b>         |                               |                                      |           |
| Otara                      | FM                            |                                      |           |
| Otara Central              | FM                            |                                      |           |
| North Shore                | FM                            |                                      |           |
| Maungarei                  | FM                            |                                      |           |
| Mangere                    | FM                            |                                      |           |
| South Auckland             | FM                            |                                      |           |
| Motutapu                   |                               | PM                                   |           |
| Otahuhu                    | FM                            |                                      |           |
| Manurewa                   |                               | PM                                   |           |
| Auckland City              | FM                            |                                      |           |
| East Tamaki                | FM                            |                                      |           |
| Hastings                   | FM                            |                                      |           |

| Location                 | Full/financial member (FM) | Partial/non-financial member (PM) | Total     |
|--------------------------|----------------------------|-----------------------------------|-----------|
| Hutt Valley              | FM                         |                                   |           |
| Hamilton                 | FM                         |                                   |           |
| Palmerston North         | FM                         |                                   |           |
| Porirua-EKKA             | FM                         |                                   |           |
| Rotorua                  | FM                         |                                   |           |
| Christchurch             | FM                         |                                   |           |
| Invercargill             | FM                         |                                   |           |
| <b>Total New Zealand</b> | <b>18</b>                  | <b>2</b>                          | <b>20</b> |
| <b>AUSTRALIA</b>         |                            |                                   |           |
| Berela                   | FM                         |                                   |           |
| Liverpool                | FM                         |                                   |           |
| Dulwich Hill             |                            | PM                                |           |
| Clayton                  | FM                         |                                   |           |
| Coburg                   |                            | PM                                |           |
| Reservoir                | FM                         |                                   |           |
| Dandenong                | FM                         |                                   |           |
| Springvale               | FM                         |                                   |           |
| Brisbane                 | FM                         |                                   |           |
| Logan                    |                            | PM                                |           |
| Westcourt                | FM                         |                                   |           |
| Whiterock                | FM                         |                                   |           |
| Townsville               |                            | PM                                |           |
| <b>Total Australia</b>   | <b>9</b>                   | <b>4</b>                          | <b>13</b> |
|                          |                            |                                   |           |
| <b>TOTAL CICC</b>        | <b>49</b>                  | <b>7</b>                          | <b>56</b> |

## **SUMMARY**

| Location         | Full/financial member | Partial/non-financial member | Total     |
|------------------|-----------------------|------------------------------|-----------|
| Rarotonga        | 6                     | -                            | 6         |
| Southern Islands | 10                    | -                            | 10        |
| Northern Islands | 6                     | 1                            | 7         |
| New Zealand      | 18                    | 2                            | 20        |
| Australia        | 9                     | 4                            | 13        |
|                  |                       |                              |           |
| <b>Total</b>     | <b>49</b>             | <b>7</b>                     | <b>56</b> |

### **Note:**

- ✓ *Full/financial member – those paying annual contributions to the main CICC treasury in Rarotonga.*
- ✓ *Partial/non-financial member – those who have been accepted under the CICC umbrella but has not yet proceeded to full membership. Therefore they do not yet pay contributions to the CICC treasury.*

-----

### **Responsibilities for this newsletter:**

|                           |   |                        |
|---------------------------|---|------------------------|
| Formatting/typing/editing | - | Nga Mataio             |
| Proof reading             | - | Marianna Mataio        |
| Duplication for mailing   | - | Jimmy Metuakore        |
| Mailing/postage           | - | Nga Mitiiau-Manavaikai |
| Emailing                  | - | Nga Mataio             |